

Te Mwane n Tania ibukia Kauntira iaon Kiribati ea roko ngkai n \$5.3 te mirion

[Bairiki, 25/07/2025] – E kukurei n taekinna ana Kauoman n Beretitenti Kiribati ao bon te Minita naba n te Mwane bwa n banen Tuun 2025, ao te Mwane n Tania ibukia Kauntira iaon Kiribati ea roko n te mwaiti ae \$5.3 te mirion. Man te raka aio ao e kaotia bwa ea tia n birirake n te mwaiti ae 81 te katebubua ke \$2.4 te mirion inanon tii 2 te ririki. Aio are ea kaota iai aron te reitaki ae tamaroa ao te mwakuri korakora imarenan te rabwata are tararua te Mwane n Tania aio, Kauntira i aonnaba, ao ai te Tautaeka ni Kiribati.

Te Mwane n Tania ibukia Kauntira aio bon ana kario te tautaeka ae Tobwaan Kiribati Party are e kateia n te ririki 2018 bwa ena riki bwa kanga aron ana Mwane n Tania te I-Kiribati are te RERF, ae ena karikirakeaki inanon 10 te ririki ma ni kona ni buoka aron mwanenakin ana karikirake nako te Kauntira i aonaba. E moan karinaki te mwane aio n Meei 2023 n mwaitina ae \$2.9 te mirion. E kukurei n kamatoa ikai te Kauoman n Beretitenti bwa e bon tuai karaoaki te bumwane man moan karinan te mwane aio ni karokoa ngkai. Aio are ea kaota iai te nano matoa irouia Kauntira n Abamwakoro nako ibukin kateimatoan rikiraken aia Mwane n Tania.

E ngae ngke a mwaiti kanganga ake a tia n riki ao nroota biribirin te mwane n te aonnaba n aron keeraken boon bwaai, te boobuaka ao te itabaraaraa imarenan aban nako tinaniku, ma te Mwane n Tania aio e bon teimatoa n aki rootaki. E reke aio man taian babaronga aika tamaroa iaon tararuana raoi.

E katurua ikai te Tautaeka, bwa ena bon teimatoa ao n botumwaaka n babairea raoi te Mwane n Tania ibukia Abamakoro aio bwa ena teimatoa n kekerake ao n kona n teke nanon te takete ibukia Abamakoron nako Kiribati.

Kam rabwa ao ibukin rongorongo riki n kamaatata iaon aio, kam konaa n reitaki ma te Finance n mwananga are te National Economic Planning Office ke n reitaki n tareboon ae 74021806 (ext 212 ke 213) ke n bon meeri nakon secretary@mfep.gov.ki